

# Vun driveriver

---

erscheint auf [www.lenauheim.de](http://www.lenauheim.de)

monatliche  
Erscheinung

Juli 2016

von Helen Alba

## Vun der Bank un mancher Halsabschneiderei

In unsrer Sproch gits Werter, die zwaaerlei un sogar meherlei Bedeitung han. Ens dervun is die Bank. Mir han alli mol die Schulbank gedrickt un derbei sin scheeni Erinnerung geblieb. Zu unsrer Schulzeit ware des massivi Holzbänk, die hinerschti Bank in der Klass is a Eselsbank genennt gin. Weil die Lehrerin dort meischt die schlimme Buwe ningsitzt hat, wann se ihre Hausaufgaben nit gemacht oder an der Tafel stumm geblieb sin.

Die Kerchebank is a e Stick Erinnerung vun derhem. Meischt han die Leit ihre Plätzer in de Bänk ghat. Die Kommunionbank war vore am Altar. Vill Leit han ach ufm Friedhof am Grab vun ihre Verstorwene e Bank ufgstellt, um dort zu verweile un zu bete.

In jedem schwowische Haushalt hats meh Bänk gin. Do war die Kichebank, oder Eckbank am Tisch. Am warme Strohowe hat e Bank gstann, druf han mer gsitzt un uns de Buckl im Winter gewärmt. Uf der Gassebank han die Leit Sunntachs ghuckt un verzählt. Manchi Bänk han e Lahn ghat for anlehne. Es ware ach die Bänkle/Schamle in jedem Haushalt. Die Leit in der Stadt han sich in de Parks uf Bänk ausgeruht. Un sogar de Zug war mit Bänk ausstatt.

Un jetz kummt die Reih an die Banke, die wu in der Stadt, eeni newer der anri, Kundschaft anlocke. Mer ment gar nit, dass sovill Banke Profit mache kenne. Un doch muss es so sin. Es git sovill Werbung gemacht, dass die Banke de Leit Geld lehne. Villi sin druf ingang un han derbei sogar ihre Hab un Gut verlor. Weil se nimi des gelehnti Geld zruckzahle han kenne. Natierlich sin die Bankleit gewixt. Sie verspreche Zinse, wann mer sei Gspartes uf der Bank deponiert. Die Zinse gin ach angerechnet. Doch wann mer sei Geld brauch un des vun der Bank abhewe meeht, muss mer der Bank Kummission zahle. Un bis mer de Rick verwend hat, is mer grad soweit, wie unser Oma, die ihre Geld unerm Strohsack ufghob hat. Nit meh un nit wenicher! Wenschtens hat mer vor Johre beim CEC sei Zinse ins Bichl gschrieb kriet un wer Glick ghat hat, der hat sogar e Auto gwunn.

Mir han vill gspart, weil mer uns e neijes Auto kaafe han wille. Wie mer es Angebot vum Autohaus ghat han, sin ich zur Bank, wu unser Gspartes hinerleet war. Dervun han ich de Vorschuß direkt ufs Konto vum Autohaus iwerweise wille. Doch ich han grossi Aue gemacht, wie die Schalterdame mer gsaat hat, erscht misst ich des Geld abhewe. Also han ich des ach gemacht. Derbei hat die Bank ihre Teel ingheimst. Jetz for iwerweise, do hat die Dame mer erschter Papiere zum Ausfille vorgeleet. Do war alles so kleen gschrieb, dass ich nit zurecht kumm sin. Freindlich han ich des Weib gebitt, mer doch derbei zu helfe. Die Antwort war awer, sie derf des nit. Jeder muss selwer zurecht kumme. Is nix weiter iwrich geblieb, wie je hem mit de Papiere. Do han ich e Lupe ghol un erschter alles durchstudiert, bis ich kapiert han, was un wu ich dort nin schreiwe muss. Derno wieder zruck zur Bank, natierlich zum selwe Schalter. Die Dame hat sogar gement: „Na gsieht der, ihr hat des ach leenich gschafft“!

Un wie ich wieder derhem war un alles noh- un zammgerechnet han, hat mich die Iwerweisung 150 Lei gekoscht. Na also! Was kann ich meh saan: Halsabschneiderei!